

四庫全書

集部

欽定四庫全書

集部

雲莊集卷二

詳校官起居注事臣顧宗泰

主事臣呂雲棟覆勘

膳錄監生臣秦

雲

欽定四庫全書

集部四

提要

雲莊集五卷

別集類三 宋

臣等謹案雲莊集五卷宋曾協撰協字同  
季南豐人宋史無傳志乘亦不載其名據  
傅伯壽所作集序知為曾肇之孫曾纁之子  
而所叙仕履但曰官零陵太守不及其詳且  
宋無零陵郡亦無太守之名殊非事實今以

集中詩文考之知紹興中舉進士不第以世  
賞得官初為長興丞遷嵎縣丞繼為鎮江通  
判遷臨安通判乾道癸巳權知永州事以卒  
伯壽所云蓋以古地名與古官名假借用之  
文人換字之陋習耳伯壽又稱慶元庚申協  
沒已二十八年其子直敷文閣福建轉運副  
使炎輯其文為二十通考劉禹錫作柳宗元  
集序稱一卷為一通則原集蓋二十卷今其



傳於世者惟詠芭蕉一詩僅見陳景沂全芳  
備祖中他不概見則其亡已久矣今摭撫永  
樂大典所載以類編次尚得五卷又得傳伯  
壽序一篇亦并錄入序稱其古詩多效選體  
然合其諸作觀之大抵源出蘇軾陳與義故  
同沈正卿作仇池石詩用軾韻陳晞顏過零  
陵贈詩亦用與義韻而絕不及於他家知其  
唱和講求在二家舊格也雜文頗雅飭有法

賓對一賦為集中巨篇語特偉麗而大旨以  
安享太平為渾穆之王風以恢復中原為戰  
爭之霸術誇大其詞以文偏安之陋曲學阿  
世持論殊乖姑以文采錄之從昭明文選不  
廢劇秦美新之例讀其文者分別觀之可矣  
乾隆四十六年三月恭板上

總纂官

臣紀昀  
臣陸錫熊  
臣孫士毅

總校官

臣陸費墀

原序

雲莊集故零陵太守曾公所作也公家世以儒顯至南  
豐先生遂以經術文章名天下學者宗之以繼唐韓文  
公本朝歐陽文忠公時文肅文昭公同以才學進兄弟  
鼎峙於朝文肅公位至宰相佐徽朝初政文昭公出入  
三朝終始全節號為名臣其所更踐多翰墨之職今其  
遺文具在典雅溫純蓋與南豐先生真雁行也公文昭  
公之孫龍舒太守諱纁之子也文昭晚罹鉤黨之禍龍

舒公力奮於學既踐世科官曲臺矣中道而殞龍溪翰  
林汪公嘗歎其文若川增條達莫見其止及誌其墓以  
簡古目之公五歲而孤太夫人強氏故資政殿學士文  
憲公之女賢而明智親授以經而督之學公穎悟異凡  
兒少長益駿發每讀書五行俱下日記數千言文昭公  
家多書已而燬於兵家貧無以市一閱於肆終身不忘  
遂博通六籍諸史傳記百家之言少從人假春秋左氏  
傳未兼旬歸之人訝其速公曰已習矣摘而問之口誦

如注水終卷乃已嘗憇臨安孤山僧舍客有稱僧如壁  
冷泉亭記者就借所乘馬馳九里至亭上一閱即歸寫  
以示客客往覆之不差一字時人驚服以為王氏之仲  
任仲宣延氏之叔堅不是過也年未弱冠試於國子監  
褒然為舉首已而不利於春官氏去從博學宏詞舉有  
司異其文將以名聞於中書矣奪於異議而止公遂絕  
意科目然嗜書愈篤雖祁寒盛暑手不釋卷為文操筆  
立成初若不經意者徐而繹之雖積功精思者不逮也

公卒之二十八年公之子令直敷文閣福建轉運副使  
炎輯公之文為二十通面以授伯壽曰先人生平為文  
甚衆然未嘗屬藁以故多所遺軼不肖之孤纂集論次  
堇堇是耳願丐序以行諸遠伯壽辭不獲命退發公文  
而讀之彌日不厭嘆曰夫文章之作古病其難其所以  
難者何也蓋材之稟於天者其警敏不可以強而能而  
學之傳於家者其源流又貴於遠且深也世之豪俊之  
士博聞強識一覽無遺材非不警且敏也然家之所傳

無源流之學徒鑿其意而為之則矜能騁怪或至於畔  
棄繩尺矣文章之家重規疊矩奕葉相承源非不深且  
遠也然天之所稟無警敏之才獨勤其業而守之則罷  
精鉢心或不免於沿蹈故常矣傳之論吏道者曰能與  
不能自有資材何可學也記之論百工者曰知者創物  
巧者述之守之世謂之工嗚呼吏俗務工末技也能猶  
有材而守亦以世況於文乎公之聰明該博既踔絕輩  
流而鴻儒宗工代起相襲心通性解目濡耳染其於文

也是唯無作作則追美於前垂聲於後必矣故其古詩則興寄淵邈詞旨超邁多倣選體為之唐律則務造平淡間出清新比事賡韻精詣妥帖至表章牋啓則又繁約適中鋪陳有叙撫古語而加剪截之功造新句而遺斧鑿之痕他文一皆類是蓋深有文昭之遺風焉廉靖樂道恬於勢利仕三十年僅至二千石而終曾不獲以詩鳴國家之盛而文出中朝之詞命位不配德時共惜之今數文公擢隆興元年進士第八為尚書郎出建使



者節俱有聲績謙厚明敏天子方鄉用之然則繼文昭  
兄弟之業而使公無九泉之憾者將於是乎在傳曰非  
在其身在其子孫其是之謂夫公諱協字同季雲莊蓋  
公自號云慶元庚申八月朔徽猷閣學士大中大夫知  
建寧軍府河陽傅伯壽序



欽定四庫全書

雲莊集卷一

宋 曾協 撰

賦

賓對賦

漫生伏於衡茅之下詠康衢之歌誦賡載之章想唐虞  
之光明欣吾身之親當賓有引吭軒眉揚袂濶步而前  
者曰古之興王必有武事以震疊海內冶金伐石昭示  
萬代發成畫運多算踧寇虐搏強悍定紛爭弭禍亂如

雷霆作而物始萌氛祲清而日將旦方其整師而鼓之  
連龍蛇翼鵠鸛兼老弱起庸悞壯士斷髮勇夫扼腕旌  
旃旂幟鞬鞞鞞鞞翕赫矍霍燦爛炳煥猿驚雁落雲合  
星散及其介馬而馳之莫不魂褫魄奪拳拘喘汗側匿  
鼠伏周章鳥竄脯尸而食薪骸以饗然後俘寶玉以告  
廟社築鯨鯢而為京觀夫無敵而不摧又何寇之可玩  
商頌猗那周歌江漢退之述下蜀之艱宗元紀平淮之  
斷雖先後之遼絕悉同條而共貫維聖代之闕如無乃

起後人之永嘆漫生曰噫子所謂志其小而遺其大聞其利而不見其害壯武威之遐暨而不知文德之遠屆憤敵國之俱立而不知王者之無外吾將反腐鼠之器而飽子以大鯨之鱠放咬哇之音而饗子以九秋之天籟賓曰唯唯生曰厥初生民浩浩其多林林而羣雖形萬之不同俱一氣之絪縕聖人爰興絕類離倫配天地以合德撫萬物而為君子焉其親臣焉其隣翁如其來臻如獸之馴而鳥之賓疾癢抑搔天下一身數文德而

舞干羽又何有逆命之苗民逮夫中衰世道多變護有  
慙德武未盡善追盛制之莫及矜善師之不戰豈威略  
之不足惡得名之至賤降及秦漢蜂聚蟻鬪微哉眇乎  
無足為見也若夫勒卒萬旅出車千輛勞徒衆於絕域逞  
雄心於一餉繚繞重湖間關疊嶂屣棄推老星馳丁壯  
風勁路永天淒野曠既啜泣以相送復望轅而悽愴則  
或馬負金勒弓閑錦韋悵暴骨之何所撫遊魂而偽葬  
天下之人既夕得哺當寒未續輟衣食之所資足軍須

於塞上曾分壤之幾時已持兵而相向霜積鋒刃星攢  
鎧仗肉飫野草血殷川浪係赤子以為俘廼矜功而獻  
狀殺不辜其幾何夫焉取乎霸王方今會聖賢諧明良  
整地軸正天綱推不忍之良心勉力行之方彊瞻上天  
之高高疑臨下之茫茫持誠意以上格如握券而責償  
信王者之孔易甚反掌之與探囊濯燠暘起仆僵涼乎  
清風驤乎康莊卽危為安以弱為強無調發之雜擾儼  
不改其故常曾延目之未瞬四海欣其樂康薦收伏匿

蚩尤遁藏墮攬搶於九天而招搖澹其不芒矣其間暇也考制度修憲章制旌旗陳輿裳法度著禮樂彰輯瑞三朝升煙一陽十畝之甸九筵之堂賓太一於閒館謹燕禱而祈禳考鼓叩鐘玉帛低昂搜簡編集縑緗施丹青刊琳琅瀟泮鏗錚焜燿煒煌聚畫史而繪事莫克象日月之光茲所以輔夏轡商磅礴虞唐甄陶帝皇垂永憲於萬祀掩成功於百王者也驩欣交通比屋連牆人曳綺縠家儲稻粱更餉迭饋一肉五漿仁心所覃鳥魚



勿傷秋秋蹢蹢圍圍洋洋如栖鄧林而樂濠梁槎蘖自  
保喬木相望豈物微而類異懷報心而不忘成迴巧以  
出技將獻心以效祥日星雲霧之燦麗羽毛草木之繁  
昌史不暇書府不能藏彼僂者禽聿來壇場不畱不禽  
廼積廼倉總瑞牒而歷選蓋創見於未嘗彼溢銀於山  
躍魚在航者何足以方之其為士者則蔭以夏屋範以  
良師飽以梁肉訓以書詩非正不談放遠怪奇教其內  
也則端亮廣肆靜專坦夷貫穿悠遠搜抉細微道古驗

今渙然不疑毀著擲龜斯焉取斯文於外也則雅歌麗  
句不浮不枝虎豹炳蔚珪璋陸離如斯之人鼓篋曳裾  
雲萃影隨放乎四遠俗易風移窮山之陞野水之湄四  
無比隣歸然茅茨莫不抑首竹帛絃歌自怡耳目端而  
志正無異說以撓之其為農者則力役不興年穀屢豐  
屏斥蟲賊掃除螟螣人力不施十雨五風町畦綺錯渠  
脉相通交灌平澍蜿如游龍白露始降場圃獻工或黍  
或稌或桂或種粼粼重重紛紛芄芄如霧散雲合之無

窮至若鳥獸四靈來同奉筭晝饁篝燈夜春暴賦弗聞  
什一是供弛擔息肩白叟黃童扶攜笑歌以輸於公如  
川之融如山之崇茫洋龍從歸視其家困廩既充醺酒  
伐羔以娛歲終昔時服田畏秋之逢霜至草衰肥馬勁  
弓汙邪滿車棄捐成功自兵革之不作含哺鼓腹不自  
知其成翁其百工之事也各售其技以安其生業有世  
守事無月更棟宇器用既備既成人効侯伯家擬公卿  
里巷相聞斧斤之聲埴土伐石鑿金屑瓊貴適用之為

先斥巧偽而勿營長子孫而不遷何他藝之敢名其萬  
金之賈也乘車衣絲累累什百草行露宿交路阡陌或  
水而舟綿亘藪澤張帆鼓枻頃刻數驛尚不取於厚征  
何盜賊之敢迫今吾與子廣意肆志泊乎安宅休乎樂  
地趨要道於百聖咏餘音於六藝室家載寧憂患不至  
履后土而戴皇天庸可不知其所自也耶今子譽其所  
鄙笑拾其所餘棄擬滄海於汙瀆儕泰山於一簣無乃  
顛躓頓踣傷子之義語未畢賓曠目擣舌頓顙振臆進

牘請書以無忘吾君之德

植菊賦

余問舍之未遂憇供佛之餘屋得閒地之函丈遠莫待  
於種木聊因既雨之澤植以未霜之菊商吹始披朝露  
新沐脫落塵坌悅暢心目斯時也天地將塞歲晏風積  
翻渤澥以搖動攪鄧林而辟易洶洶薨薨柯改葉脫日  
將旦而起視慘喬木之無色旋俯盼於孤芳曾不磷堅  
而溜白瞻柔弱之自持羨光彩之相射彼羣妍之競春

散紅紫之紛如顧慶賞之未已倏顛沛於須臾乍烏合而鳥散正比夫市人之與販夫况白頭之如新約久要於索居何此華之挺特莫再莢而猶初處顧盼之近地期香盡而色渝豈跼萼之膠固卒自遠於泥塗當三徑之就荒扳孤松以為徒形傳畫史之譜功載醫師之書還翠葆於槁項滅空華於清臚奉晨昏於甘旨欣壽母之顏朱故得英實騷人之腹苗登天隨之案供南陽之汲飲入東籬之把玩偉微物之異稟宜君子之屢觀命

家僮以封植俾本根之無患春茁兮秋芳永作幽人之伴

五言古詩

擬古六首

濯濯春月柳低映金張宅風光到飛絮枝頭少顏色榮華豈不好歲晚負賞識堅貞自中心君看松與栢

幽牕射明月寂寞閒素琴朱絃不改調撫弄無好音文衣襲綠綺明徽鈿黃金君恩一朝異對此千恨深

憶昨初離別羞容不成歌長袖未曾舞塵埃生綺羅君  
恩一言足歲月豈在多澤國多悲風江湖易濤波遊子  
久行役歲晏今若何迢迢朱樓夜數起瞻明河不如長  
江月素影常相過

迢迢千尺松下有綠髮龜流膏穿厚地配此凌雲姿隱  
見雖若殊雪霜俱不移置身苟得地共保千歲期  
孤峯鬱嵯峨千古常峻峙下有迴環水流浪無定止如  
何深遠意盡寄七絃裏妾意極高山君心甚流水



日月無時停飄忽成隆冬烟雲慘不舒暮雪陵颼風永  
懷歟瘵憂藉此衣褐重蟄蟲逐微煖地底度歲窮飲啄  
却外物一氣常自充人貌肖天地不能保微躬

擬結客少年場

結客少年場定交杯酒間相傾在意氣握手出肺肝倉  
皇夜扣門然諾曾不難所至足賓客後乘車班班鄴杜  
走馬歸百萬供一餐路人側目視仇家骨常寒紅塵一  
箭飛大索喧長安可笑愚儒生相逢話辛酸

和唐使君柅古風二首

官遊非所安舉足常徊徨官事似馬曹自謂真漫郎猶  
慚上官前簪裳久低昂歸輒痛掃溉草木有幽香但令  
眼中青不問眉間黃何期逢故侯一見心清涼揚袂指  
鄉國矯翼西南翔危言氣崢嶸高懷涕淋浪更憐凡草  
木欲置桃李場作詩借光輝此意寧可忘

志士身許國夫豈慕高爵感慨九重恩領受千里託安  
邊志獲就解印良亦樂厚祿棄千鍾壯氣橫六幕造朝

吐奇論投合期契鑰終焉謾喋喋遠意誰領略琳館返  
高卧鈴齋休畫諾擬尋一畝宮未辦千金索松楸已在  
眼阡陌想交錯迴頭長安日傾心比葵藿

送汪汝馮沿檄造朝

春風扇微和散入桃李塲枯枿受披拂處處生輝光有  
客事行役起拖凌官塘浮家入烟浪琴書榮成行旁有  
玉頰人妙指出宮商主人志超俗心胸瑩琳琅但使秋  
月明豈慮浮雲翔富貴恐不免賦予元有常善保萬金

壁母遺輕毀傷豈無山徑蹊徐步遵康莊

陳晞顏獲玉兔甚奇邀予賦詩

晞顏名從古

一氣散萬有飛潛異形姿烏鵲自昔然羽翼不可移穎  
也衣褐徒爛斑迺其宜今茲獨何事皓皓涅不淄毳毛  
玉雪如整整機上絲無乃真得僊傳載非詭辭騎蟾入  
廣寒成此一段奇長生侶素娥不受塵土羈祇應得得  
來隱見必其時往牒紀創見奕奕登瑞旗退之號崛強  
雄誇見文詞君侯過人行精神動皇祇屢供平反笑長

詠南陔詩異物自來馴不起山林思霜月照庭戶晴雲  
點堦墀致此非好玩於焉卜期頤上堂閒起居秀色增  
兩眉

鄧器先北窓

今人競圖南朗朗百間屋夫子胡不然嚮晦一窓足北  
窓吾亦愛嘗謂所樂獨豈知交游中昌歆或同欲光澄  
窮永晝風遠宜三伏誦書音和平高卧夢清熟吟詩與  
作賦未覺環堵感心安爾許寬六合寄一粟閒聽飛雨

灑靜看游蜂觸一笑知莫逆排闥不待速

次韻李粹伯登鎮江倅廳富覽亭

粹伯名處全

酒餘共逍遙散步升高岡萬物困霜雪歲晏俱老蒼江

山一臨眺志欲凌八荒青霞儻見分誰能束冠裳

原註韓退

之云乞君青霞  
佩與我高頎頎

題李粹伯晦菴

天道有消息物理兼屈伸鳥匿定將擊龍蟄以存身卷  
舒雖不同為用常相因老聃晞髮時忽然似非人肢體

尚可墮外物真埃塵信知猶龍姿涵養知幾春寂寥千  
載下喬孫豈其倫磊落感意氣崢嶸富精神迺以晦自  
居悠然返天真漁樵欲爭席鷗鳥行相親形謀不可掩  
眉端已津津風雲一朝便垂天起潛鱗

王炎敬安吉丞廳真清軒和沈文伯韻

炎敬名  
彦融文

伯名  
長卿

青山如君子臭味我族類向來傲官府正自惡俗吏主  
人清且賢菽水無虛偽胸次塵滓盡端可肖人意軒窓

自羅列獻此重疊翠公餘一隱几舉目窮幽事昔為幕  
中賓妙語了同異孰堪畏棲遲勝境配高義要從孺子  
濯不逐衆人醉吟哦坐書藁袖手太阿利沈侯負能名  
二絕一言蔽聊同座右銘此語君莫墜

江梅

北風號喬林萬象無容姿高標自有時正與冰雪宜老  
榦儼枯木疎花粲橫枝刻玉費天巧不為俗眼窺託質  
在空谷清高終見知論功鼎鼎間枝頭子離離



蠟梅

小樹列仙質脩然道家裝雲帔掛淺絳銖衣曳微黃清  
風一披拂芝蘭讓幽香老子專鼻觀此花正相當就令  
困霜雪肯受泥塗傷題評得名字詩人惜輝光雖無調  
鼎實不作時世粧

章季子携所作樂府來以詩謝之

平生尚幽僻塵務百不省屢從松竹遊身閑愛官冷何  
知事大繆窮日厭鞭打抽身對佳客屣倒冠不整吏徒

環顧人爲我忍俄頃忽忽上馬揖語略意已領新詩滿  
懷袖璀璨吐光景歸來坐明月萬象入清境風林起驚  
鵲閑窓散花影吟哦不成寐盡此良夜永

題大兒新安官舍三樂齋

吾先聖人徒游夏同淵源孝友與忠信入道先本根下  
視晉楚富商歌滿乾坤一唯了萬事伋軻繼師尊至今  
百世後家法要不煩近數高曾來潔身等璵璠當時天  
下士白首稱曾門

原註陳後山自謂曾門一老

世掇太常第自致冕與

軒養祿到北堂孝哉無間言猶悲鯉庭空遺恨終自吞  
至我壯無成浪使歲月奔文科始不嗣媿此朱兩轡賴  
汝念祖烈先登倡諸孫寂寥四十載重拜雨露恩吾年  
獨天假將鷄見飛顰醜顏幸一洗積德慚九原三年作  
尉歸橫經處侯藩孤城山水稠草木霜不蕃官閒身無  
事舊書可重繙故職在六經緒業勤討論避堂舍翁媼  
齒在髮未髡不憂俸酸寒羅列奉晨飧公黷沸絃誦私  
室合簾塤氣完萬物輕始驗中所存結屋將樂此不換

鐘鼓喧愛汝此樂地老蒼離童昏朱金了無慕况廼紈綺繁真趣出自然盎盎如春溫名齋憐汝志可使薄俗敦此樂吾家無詩之勸仍昆

飲沈氏園得僻字

會心足勝侶暇日訪春色慵尋剡溪榜厭曳永嘉屐名園可徘徊勝槩在咫尺峯巒起平地村落墮城壁梅橫前嶺峻柳列長堤直最愛臨水亭欲背依山石沉沉想潛鱗錚錚聽仙奕初無杖屨勞具享山林適一尊供笑

語四座列豪逸規摹西洛舊髣髴香山昔

原註是日會者九人

愛

酒太白狂耽詩少陵僻始靜姑縱談中喧或爭席殘鐘  
咽林際新月掛簷隙飲散興未厭人歸境愈寂何必記  
昔游虛空了無迹

送鄧器先赴羅田尉五首

我始來相居談公口瀾翻平生驚人句筆力正始間古  
人不可作因君見班班矍然起懦庸褰裳撼詩關

吾鄉盱江西流轉半天下夢為故國遊流涕指丘社漂

萍偶同止風力巧相借感君聲氣似剪燭對清夜

之子抱奇器彈冠始茲年邑人望風度夫豈南昌仙樂  
土風俗淳吠犬申旦眠弓刀無可試斑衣日蹁跹

古郡有奇觀祖祖燈相傳子來後往括青山古依然紛  
紛簿領中深觀常安然但使內外盡饑餐困須眠

君齒餘四十見推十年兄驚呼昔安在相逢太晚生坐  
語未及盡風帆忽遐征願君懷此都吾廬始經營

送趙德莊右司赴江東漕八首

德莊名  
彥端

往年際風雲濯濯春月柳俊氣橫九天下筆蛟龍走歲  
晚收其實落落堅且久澹然松檜質不為霜雪朽

軒蓋事朝謁閭闔方晨趨霜露懷松楸慨然賦歸歟確  
志感清哀載以使者車往宣問事條勿但安田廬

正色立公府嘉謀贊巖廊材華動人主咫尺駕鷺行掉  
頭不肯住清宵夢滄浪丈夫貴勇決養此百鍊剛

行邁未為遠兩州東西都中天敞華闕魚鑰黃金鋪山  
川儼形勢貔貅凜戈爻正須埋輪手先聲震江吳

建業一都會由來帝王畿曠哉懷古心陳迹猶依依當年王謝家青紫滿烏衣萬事一丘土簡策徒是非

飽學兼內外超然悟空無是身任東西乾坤一蘧廬目前謾紛紜一致總萬殊良欲行世間不效山澤癯

鄉來遠門牆引睇想光輝宦游偶相值閒關得因依都門送星輶依然寸心違勿為賈胡留速書季子歸

我公廊廟姿當為濟時霖生材必有用應物初無心異時百僚上金貂耀華簪富貴恐不免易退其自今



賦趙有翼仇池石次沈正卿用蘇翰林韻

有翼名師

嚴正卿名清臣

貪夫居奇貨什襲藏結綠寧知十五城不救卞和足豈  
如嗜石人丘壑在胸腹不知連城價但賞數峯感長公  
仙去後兵馬遂南牧尤物落何許心知委溝瀆何期超  
世賢愛石不愛玉夜半負之走包裹隨竄伏一朝返窓  
几時清端可卜李虎初平羊案上紛相逐崢嶸幸無恙  
不問牛馬谷趙侯天機異閱世輕嗜欲好奇與嗜利達

觀均一曲正恐便棄置就賞君宜速

送趙有翼通守吳興

江南雨無時桃李迹已陳有客念江湖別乘陪朱輪  
明德先九族恩殊在廷臣惟公真龍種眉宇猶津津  
不受膏粱昏辭章動楓宸合著玉笋班冠冕朝大昕  
去丞股肱郡要此骨肉親蕭蕭雪水鄉溪山繞城闌  
空光纈紋亂倒影圖畫新金石富文墨烟波多隱淪  
坐想賢使君迎笑均憑茵席間荀陳俱會此主與賓  
陳榻對清夜潘

興行莫春拄頰愛爽氣揮毫詠風蘋遠近入題品蒼翠  
生精神我忘鷗鳥盟低徊踐香塵因子動歸興詰旦車  
當中

七言古詩

寄題蘭陵郡齋梅露堂

蘭陵為郡更齊梁地望卓犖聞四方清班詵詵儲材良  
相踵往佩太守章憲公遺愛初未忘當時瑞露今名堂  
於茲遼遼幾星霜此邦復得尚書郎政似古人天降祥

揭榜華屋遙相望使君燕寢東西廂嶺梅林林分兩傍  
春事已退墮渺茫調羹有實升廟廊葉間奇葩忽芬芳  
縹白異狀中有香襲績千葉成花房天公好善善必彰  
故出瑞物非其常此花顏色見未嘗浴以沆瀣宵灑灑  
炯如珠璣綴琳琅蜂房割蜜蔗流漿邦人歡呼走且僵  
我公中心念丁黃撫摩凋瘵還耕桑天錫嘉瑞不肯當  
盡撥鉅美歸聖皇公豈我留返鵷行但有盛事存甘棠  
送趙有翼監丞造朝供職

君侯昂然百夫雄近之和氣如春風揚眉高論多折衷  
衆人斂衽稱名通發為詩章燦壁琮氣豪筆健敏且工  
口占欲使十手供春雲容與朝霞烘肯如空堦號秋蟲  
槁項巖穴甘老窮是將織文裨袞龍潤色造化分天功  
奏之清廟流笙鏞宜使正笏趨槐楓發舒平生學古胸  
時吐奇論驚羣公久矣高門映袁宗金蘭投分自諸翁  
我嘗聯曹愧凡庸竭蹶道上昔所同朔雪撲面花蒙茸  
六龍先路如雲從重來茗溪奉從容好若膠漆始且終

先後唱和如歌鐘君還清班朝九重我將轂下居治中  
他時涉筆朱墨叢已見矯翼凌長空一笑道舊雙頰紅

次翁士秀雪長詠

士秀  
名擢

陰陽持權或羸縮運氣循環更剝復忽驚寒凜襲重裘  
元是祥雲散平陸登山不覺屐齒折索酒仍催葛巾漉  
蕭條貧居馬為二瑟縮凍坐龜藏六揮毫謾詫句中眼  
對案常逢食無肉未謀南畝五百弓浪說朱輪三十輻  
且欣膏潤入郊原為拯黔黎出溝瀆敢將固陋測帝心

概想生靈皆子育將春欲放草木葉成歲先須天地肅  
伊余平生貪靜勝有此一廛從穆卜應憐此地久憔悴  
端向吾廬增煜煜巧隨高下綴琪樹任逐橫斜落雲屋  
塵緣頓覺一羽輕詩句但驚翻水速坐令歡意盪愁思  
仍遣時寒破常燠嵇康醉狀聳危石衛玠羸姿立修竹  
排來一一盡連壁環立詵詵皆冠玉晚風徐韻仍佩環  
枯木無心亦冠服曉連青女增粲粲夜映金波兼穆穆  
遮藏春色失爛斑漏泄梅花有芬馥掀髯一笑萬事空

細讀君詩倒醺醖

次韻翁士秀雪再作

尚記東郊千頃白夜不聞聲曉盈尺飄洒速若赴敵兵  
密陣橫空誰督責且從膏澤落田疇不厭寒威淩枕席  
謁來重見凍雲凝似欲飛花襲遺跡起尋藜杖行東臯  
麥隴芊芊淨搖碧平生殷雷轉空腸此日准擬千倉積  
老農甚喜天破慳尊酒相携慰疲劇土膏滲漉入鋤犁  
丁寧孫子耕須力勸農使君軟語多莫待官儂費鞭策



人言回天古所難坐變樂歲須臾間丈夫行志自其所  
會作一朝黃鵠舉

和表父姪李狸竹夫人歌

我家門戶瀟灑侯渭川千畝封君儔自應秀氣到兒女  
骨格凜凜含清秋向來玉立蹄輪道已解使人除熱惱  
事君為取冰雪清豈是與君相媚好人生用捨元有時  
秋堂掛壁何足悲不是短檠長棄置會與夏簟還相宜

周知和以蘇陳倡和韻賦水仙江梅蠟梅三種

花謹次韻

知和  
名野

天工著意初放花三英凜凜真一家  
鏤冰點酥更團蠟始信功深解生物  
臨風卻嗅心自知粲兮粲兮哦古詩  
幾年刻玉但成葉一笑真同長康絕  
得非仙種來神山為伴老子終朝眠  
歲寒得友不忍去且對衆香勤覓句  
鼎分風月俱可人如陳竇劉人所君  
原註三君  
事見東漢詩場戰罷  
戰千越盡掃色塵歌一鉢

周知和李粹伯一再和鉢字韻詩益工勉繼元

韻

道人鍾情獨此花封植絕類富貴家母令攀折強封蠟  
精神頓減非生物五陵少年那得知氣使造化須新詩  
春工未遍裁雲葉但賦貢金品皆絕公家甥舅如玉山  
清夜秉燭愁花眠一朝奉節公馳去又疊陽關斷腸句  
誰專此花蔣徑人公自無愧面覲君來詩聲調轉清越  
謬對霜鐘扣銅鉢

次韻翁士秀病起

一聞何濶昔未有擬遣蒼頭問安否果然示疾毗耶城  
靜看醫方出吾肘平生豪氣干青雲客疾來侵豈能久  
已知筋力却几杖復見精神照窓牖花時倏忽風雨過  
無語酬春愧顏厚管城端復束高閣公不自倡誰為首  
俄驚肆筆出大篇聊示作家三昧手我今方覺疾病嬰  
豈是同生值陽九原註翁與余同歲生鏡中華髮略相似材具超人  
定非偶公今濶步躡中朝顧我一麾方出守如何江湖  
大國楚笑謂曹鄴言地醜似矜斷木欲青黃寧有長松

生培樓

五言律詩

暮春雜詠八首

曲徑穿深樾  
支流旁小亭  
鳥將雲共遠  
天與樹俱青  
水色清堪掇  
風聲靜可聽  
壁間餘地在  
落筆記曾經

蓮沼瓊瑤墮  
萱庭錦繡張  
靜聞人語好  
閑愛水風涼  
藜杖休行樂  
蒲團且坐忘  
沙禽相識慣  
趑趄近胡床

晝永常支枕  
賓來旋整冠  
日篩槐影細  
風撼竹聲乾  
壤

沃耘耕少人閒賦斂寬近知田舍樂不記昔為官

客路清溪好人家綠樹閒淒涼何縣雨想像別州山  
馴雀飛還下遊魚去自還兒曹了官事天地一身閒

目斷江頭樹襟披海上風荷鋤偕婦子擲釣共兒童  
晚篁關心碧秋蓮滿意紅歌聲何處起舞手為年豐

信使頻驅傳元戎罷枕戈茆茨隨處有禾稼望中多寓  
客時吳語豐年半楚歌泰然真樂土誰為挽天河

楚甸三千里旌麾列大邦渺瀰連沃野隱幘抱長江此

際藩王室何人擁將幢向來稱下邑國士有無雙  
隔岸連平野鄰家背短城海風無日息楚水照人清有  
子能干祿全家可代耕飯餘無一事更覺勝平生

蓬戶

野客何為戶編非茅即蓬松堅難闔闢竹瘦謾牢籠疎  
密殊無準麓纖任不同我常知善閉寧向此矜功

王叔武示忠州張使君德遠近詩次韻三首

叔武

名秘

垂紳立朝著智略勝吾丘列戟分名郡兒童說細侯卷  
舒誰罣礙中外且嬉遊聞說淮南守天邊又拜州  
妙理居言外高懷見酒邊無心千里奉有意一燈傳栢  
樹誰能指虛空莫問年爐香聊閉閣何處覓心田

安心今得法問道舊名庵雅致追龐老高風數泐潭遠  
公容入社彌勒本同龕寄語邦人道叢林始罷參

倪文舉寺簿挽詩三首

文舉  
名偁

盛德逾人遠高談造理深保身元有道應世了無心別



日更寒暑交情隔古今紙窓風雪夜猶記掉頭吟

學植春同富詞源海樣寬細聽朝士說宜著侍臣冠  
泉壤歸何遽容臺席未安蒼旻如可問不遣淚河乾

水國相從日文場並進時駕材元有限逸駕自難追  
方指青雲路俄聞薤露詩鵬程千萬里却付稱家兒

和韓子文

子文名  
彥質

寄迹驚殊縣論詩得勝流更容參往返不恨此淹留  
絕唱終三疊長謠擬四愁同遊有陶謝莫賦仲宣樓



欽定四庫全書

雲莊集卷二

宋 曾協 撰

七言律詩

送李秀叔吏部拜命赴闕二首

此地詳聞月旦評精神英發氣和平  
胸蟠七澤波瀾濶骨鬪九秋風  
露清窮巷蕭條從我老半生懷抱向君傾  
忽聞來促朝天騎應記當年曳履聲

君王念舊數星霜驛騎風馳詔濕黃  
濶步入趨天北極

舊班聯踐漢中郎  
好行素志應須力  
穩上青雲不用忙  
異日相從話功業  
知無愧色沮剛腸

李懋之壺中齋請賦詩

懋之名勸

山川吞盡一壺中  
未見先生芥蒂胸  
要識廣輪藏粟粒  
且將談笑舉針鋒  
橋中載酒初無礙  
花裏行車足有容  
可但大千歸眼界  
網塵從此現重重

次韻翁士秀見贈二首

川原積歲阻交情  
佳客常思置驛迎  
花縣論心尊俎樂

竹宮識面歲時驚久知書作征南癖更覺詩同東野清  
却斂橐韉真退舍君才屹立五言城

興來躡履便追隨共約乘風汗漫期述作正須陶令手  
利名不上紫芝眉名高似斗誰能挹量大如淵不可窺  
老去故交今絕少高情傾蓋樂新知

再次前韻二首呈士秀

相逢此日勝平生不厭撻節數送迎樂地共欣三徑就  
詩壇仍見一軍驚風飄柳線曾經染雪著梅梢分外清

光景喚人無計奈刺煩佳句破愁城

錦囊惠我句增奇賞會應須得子期萬頃淵深連渤澥  
千尋巉刻對峨眉心游舊簡幾忘食家有名園不暇窺  
誰報詩人春到了屋山應有候禽知

次韻汪汝馮見贈

身閑官冷巧相如草舍柴扉況並居刮目尚為三日別  
論心真勝十年書屢煩折簡催羸馬知有新粧出綺䟽  
興發會須攜短策要看風味慰逃虛

次趙有翼簡徐聖可元韻

聖可名行簡

已向幽居賦晚晴  
欲經絕壁訪神清  
不憂五柳荒松菊  
敢嘆三閭帶杜蘅  
媿無風月三千首  
賴有絲桐一再行  
誰似孔庭能父子  
繼揮高韻思如傾

喜晴

詩翁高興動新晴  
未踏湖山句已清  
領略風光初入眼  
指麾泉石欲盱衡  
屢傳黼黻宸方圖  
舊應有鋒車便趣行  
莫向苕溪戀行樂  
葵心元向太陽傾

李粹伯對月見懷次韻

初收雨脚萬絲懸妙手誰人補漏天佳月素華迷夜旦  
好詩餘味滿中邊

原註佛書吾說  
如蜜中邊皆甜

裴徊無柰謝希逸勦髡

總輸邊孝先見說百篇酬一斗高門重見酒中仙

王叔武示和人雪詩次韻二首

天上瓊花次第垂且教微霰向塵飛玉糝重見嬌飛燕  
鶴舞初疑老令威農事預知三徑樂釣舟遙憶五湖歸  
夢迴陡覺衾裯薄應是迷空一尺圍



迴瞻一色暮雲垂癡雀相看凍不飛地闌爛銀窺佛界  
班連萬玉想天威輕明照日千山靜寒碧浮江一棹歸  
見說孤吟清到骨知君不羨妓成圍

送薛士昭

邂逅江干得勝流襟懷冰玉氣橫秋相逢便及平生事  
欲去知難苦死留殘漏寒燈催別酒淡雲微雨送行舟  
虎頭自是封侯骨穩上青雲莫倦游

沈正卿示探梅詩次韻

數點微明已露奇解顏相見却先知攜壺擬醉無窮樹  
走馬來看第一枝照水意閑真我輩釀寒雲重正花時  
自從親識春風面不信良工畫有詩

再次沈韻

獨將春信報天涯豈是無情定有知巧占歲寒憐韻勝  
冥搜詩句愧辭枝松篁有約成三友桃李爭功彼一時  
珍重休文三昧手盡回佳處入清詩

正卿借韻招同社候雨霽訪梅次韻

看梅常擬到參橫最愛微霜墮太清  
輕棹幽探煩結約  
繁花亂點要晴明  
直須香裏同扶杖  
莫問尊前幾舉觥  
誰向詩盟最先軟  
定知一座自公傾

總司官餞董少卿

蚤聞天詔下江津  
元是君王自賞音  
闊步穩登霄漢路  
借留難副士民心  
緩歌共有留連意  
別酒休辭潏灩斟  
三節踵來公去後  
空餘離恨一江深

謝翁子履子進惠詩二首

子履名履之  
子進名升之

聯翩連壁扣柴荆剥啄初聞屣履迎華袞借褒知不稱  
纍珠入手見須驚長篇勢欲傾三峽古調聲堪被四清  
聊遣世人知句法君家元有謝宣城

偶結茅茨一水湄便從佳士得心期可堪大老留青眼  
更向諸郎識白眉驥足方求千里附豹文先許一斑窺  
鶴鳴子和君家事此樂外人那得知

次韻謝鄭仲南惠詩二首

仲南名棗

毫端萬態鬬森嚴山比崇高粟比纖學博自應前輩似

才多真可萬人兼  
心傳家法書仍在  
腹有成章筆未拈  
雄辯縱橫皆正論  
却羞季子尚飛笄

腰組歸來且打乖  
闔廬纔可着吾儕  
可堪佳客尋衰迹  
更著新詩起壯懷  
枉對青山記排闥  
好當紅藥詠翻階  
一從悟得驚人句  
自悔枚臯賦似俳

謝翁子亨惠詩

子亨名泰之

為愛高門足鳳麟  
恂恂濟濟燕雙親  
和聲自得堦簾樂  
巧思爭裁錦繡新  
句裏直須希鮑謝  
客來今復見荀陳

要知家法傳無盡更到垂髫總過人

謝蜀人侯君惠詩

我曾魂夢到西南翠碧相圍遠近山睡覺不知身許遠

神遊却悔便求還

原註丙子歲夢至蜀道濃翠周匝可愛求還二字用列子化人事

國家

舊數兩川最人物尤勝二漢間笑讀君詩生羽翼便如  
舉目對孱顏

送向兄荆父帥維揚二首

荆父名均

寵數頻煩色愈溫耐官丞相克家孫川原迤邐提封闊

旌森森嚴上將尊心識古人風節似望知前輩典刑存  
春風草綠長淮淨眼看頻流雨露恩

大父曾開刺史天固應陳迹尚依然邦人却怪家風在  
故老今推宅相賢仗鉞秉旄仍置使輕裘緩帶更安邊  
須知此日分憂重更覺光榮掩後前

和陳晞顏春盡思歸二首

坐閱榮枯鳥過空青冥誰解指行蹤

原註佛書如  
虛空鳥跡

柳邊初

見鶯調舌樹底俄驚鹿養茸稱副閑身清晝永裝添靜

境綠陰濃宮桃正倚東風醉也逐廻溝出九重

小白長紅幾番

去聲

飛清詩端為解愁園莫貪藉草尋幽

事須念留花苦待歸

原註意屬陳文

杜酒政須常在手沈腰元自

不勝衣織成春恨無窮盡誰遣天孫不下機

夜飲枕流次日以詩記陳迹

水軒幽會六人同

原註李粹伯汪汝馮蔡清字王景文柴鵬舉與余六人

夜色蒼茫

蠟炬紅浙浙好風天似水紛紛高論氣如虹罰籌蛩起觴無筭醉骨山頽榼屢空却坐胡床看月上對人樓殿



有無中

再飲枕流和王景文韻

乞得微官本為閒生憎簿領積如山  
鼎來佳客無陶謝  
向後微言到孔顏

原註飲將散  
諸大談道

安得朱絃起秋思  
預愁清

淚落陽關壯懷醉裏依然在不信  
蕭蕭兩鬢斑

昔先君子與司直兄相知文字間  
諸孤懸隔各  
未相聞一旦裘父姪惠然見訪  
共道家庭舊好  
撫今念昔慨然傷懷因成小詩呈裘父

傳業懸知臭味同  
許時蹤跡馬牛風  
莫誇今夕為何夕  
不見吾翁對若翁  
道舊幾驚心欲折  
問年俱恨鬢成蓬  
只應飽學非同調  
滿篋新詩字字工

表父見和復次韻

郢質由來迥不同  
曾當巧匠運斤風  
肯過異縣尋癡叔  
聊遣高談慰病翁  
骭髀吾甘老苕雪  
飛騰君合上崑蓬  
祇今已恨成名晚  
好把文章問化工

和表父見贈二首

平生傳業志詩書常恥朱門銜綺襦作意文場旋閣筆  
強顏宦路亦分符駸駸春意回平野戛戛籃輿入畫圖  
但恐相思勞小阮想從煙際望重湖

鄉闕重見慰餘年踉蹌迎門喜欲顛先遣好詩陳曲折  
更搜餘論盡中邊尚勤葑石論臣佐莫向杯觴近聖賢  
杜口不言窮達事知君客疾不難痊

俞義仲輓詩

適意平生水竹居雌黃在手為藏書久看英子聲名早

常恐良朋過往疎方喜安輿迎綵袖忽驚平陌走喪車  
青松翠栢新阡路常使行人淚滿裾

邵衮臣挽詩二首

衮臣名希仲

軒冕初期咳唾收一官白首歎淹留已嗟遊宦騫騰晚  
遽遣功名取次休中壽不令周甲子遺編曾擬傳春秋  
未應埋沒隨黃壤定作騎鯨汗漫遊

幼年著舊識東牀

原註衮臣王子雲司諫婿

壯歲名喧翰墨場老去里

間推聞望向來士子誦文章芊綿宿草悲春盡牢落佳

城怨夜長賴有集賢多故舊筆端三絕刻琳琅

寒食雨霽

亂雲將雨趣狂風掃溉氛埃瞬息中指點山川開淨綠  
按行花草失歌紅槐榆改火年年事簫鼓迎神處處同  
自是平生觀物化不因春去始知空

湖山堂

自從幽處得官居不向良工覓畫圖青繞簾帷山極望  
冷侵庭戶水平鋪漁歌歷歷來天外帆影飛飛入坐隅

俸粟有餘公事少卧聽風雨落江湖

衛公堂二首

衛公精爽故依然陳迹淒涼不記年  
亭遠謾傳曾起草樓高無復見籌邊  
新銘初勒風煙上舊觀都忘歲月遷  
從此南徐矜勝槩美談留與後生傳

寥寥相望兩邦君冰雪襟懷錦繡文  
身見共誇新令尹名高猶榜故將軍  
神交頓覺千年近心遠初無一間分  
只有玄談探佛海坐傾端復掩前聞

原註今太守鄭公窮探妙道與衛公小異

耳

送張忠州使君八兄二首

邂逅江干不自期，坐傾談屑看霏霏。  
豈無清禁摘華地，只得名城衣錦歸。  
惜別定知雙鬢換，問詩常恨寸心違。  
目窮千里蒼茫際，惟有檣烏向北飛。

東閣如公不挽留，又飄征袖入西州。  
四方謾說多奇士，千騎纔教占上頭。  
那得長繩縈去棹，不堪淋雨助離愁。  
長江自古常東注，莫遣仙舟得泝流。

題陳倅升卿芝草圖二首

別駕陰功草木知一朝變化出神奇乍驚莖葉還同長  
更羨卿雲向下垂文筆分明傳異狀畫圖次第記當時  
嘉祥創見輕千古信宿曾看十樣芝

原註圖記云兩日之間十變其狀

高義從來蓋里閭粉榆社底得新居萱堂秀骨松難老  
蘭砌清才玉不如天產寶芝彰瑞應地靈妙相紀生初  
定知繼展調元手不負平生萬卷書

沈正卿重梅次韻



恰占春工一倍奇休言造化總無私  
香羅翦透因稠疊  
鼓玉裁成却附離  
愛玩枝頭無限思  
題評筆下若為辭  
開時縱晚春猶早  
底事遊蜂便得知

和俞幾先喜雨二首

幾先名長吉

萬人望歲正艱難  
坐對盤飧泚在顏  
沿泖謾談舟楫利  
圃畦未放桔槔閑  
歡呼甘雨今朝足  
准擬豐年舊觀還  
眼裏塵氛掃除盡  
撲人空翠繞西山

自嗤宦況局寒蟬  
已覺歸心決大川  
勿使山靈長謝客

幸餘溪友舊忘年無心欲羨千鍾祿有意初謀二頃田  
雨足年豐無一事春蠶將老只思眠

和蔣子尚

子尚名志祖

偶隨船趁上淮州忽見霜凝尚此留屢指雲天談故國  
幾從煙水理歸舟自知客子驚殘歲賴有斯人破旅愁  
他日西牕剪銀燭巴山却話夢中遊

和王雅州見贈

懷人俄復幾春秋三舍相望見末由千騎前驅催首路

九重側席納嘉謀茅茨至陋何堪顧蘋藻雖微尚可羞  
淮擬掃除迎上客玉蕤陰底列觥籌

原註謂醑  
釀盛開

陳晞顏董漕湖南過零陵用簡齋韻見贈次韻  
謝之又賦一篇述懷

筆到鍾王意有餘詩章高古過黃初班行未上論思地  
遠使聊宣寬大書乞與豐年均飽煖更申嚴令絕侵漁  
肯迂使節存支郡咫尺猶嫌會面疎

平生志不在羸餘久擬揮毫賦遂初莫問倚墻空甌石

但令盈几足琴書  
幸存茅屋幽堪隱  
况有清溪近可漁  
賸欲抽簪訪松菊  
要憑突兀看扶疎

都漕適至作詩相慶次韻

邂逅江干倍輟然  
喜公彊健過前年  
筆端電掃三千字  
言下冰消十二緣  
傳業有人吾免矣  
擊鮮溷汝古同然  
自今擬棄人間事  
摠把傳家付阿圓

和李粹伯

萬事知公一髮輕  
尚憐花草喚愁生  
酒邊意氣來酣戰

筆下文章要主盟，絕唱共驚神。  
有助擅塲將見敵，無爭  
搃輸老子工。藏拙飽食安眠百不營。

寄題陳晞顏敦復齋

一入虛齋百慮沉，箇中何待覓知音。  
雪收未起龍蛇蟄，境靜初窺天地心。  
五里霧中藏豹穩，九重淵底得珠深。  
自從占斷寬閒野，寂寞虛空無古今。

趙有翼招同社出遊次韻

總道無情却有情，撩人幽事不勝清。  
擬同騷僕從長古，

不遣橘奴寬李衡四山濃淡要題品百卉後先宜按行  
登覽不憂風雨迫揮戈須駐日西傾

諸公出遊有翼有詩和者盈軸次日飲正卿家  
出以示余走筆繼韻

可堪俗事苦相留不許聯翩李郭舟酒興定知鯨浪吸  
詞源聊看峽江流名高北斗誰能挹價重連城未易酬  
恰似西都數人物校書中秘讓諸劉

有翼有詩督真率第二會次韻

滿眼春光處處山，妨人行樂幾多端。  
絕憐玄圃一步地，便勝香山八節灘。  
莫放賞心閑裏過，擬將物化靜中觀。  
未開桃李留春事，可是芳苞不耐寒。

送表父姪還鄉二首

氣吐長虹一世豪，尚憐花草助風騷。  
正須重碧澆胃次，不遣輕霜上鬢毛。  
浪說清時敞東閣，誰捐好語到西曹。  
江神却解歸歟興，賸放潮頭百尺高。

塵外情懷得自由，便攜琴鶴上歸舟。  
露寒月白關心夜，

山瘦江清滿意秋却背京城無眷戀去尋古迹有遲留  
奚奴莫厭詩囊滿重紀山川爛漫遊

代常州請平江鄭侍郎

接壤西東似犬牙一時迎送使君車應憐壯歲棠陰在  
未覺神京驛路賒飛觀慣看涼月挂層樓將見瑞雲遮  
當筵莫訴盃行速兩地春光作一家

代人上平江徐侍郎五首

秋到人間斂翹塵于門初見喬星辰須知宇內風雲合



況是天邊雨露新  
盛德可容窺底蘊  
殊功端自見經綸  
不應久袖安邦手  
運指從教轉大鈞

漢朝法從讓嚴徐  
却數羣公總不如  
千載流芳傳竹簡  
一言偃革見囊書  
由來東海傳高閣  
復見甘泉載後車  
富貴功名兩相似  
崑丘元自產璠璣

雙旌來自日華邊  
帝遣銜恩下九天  
膏澤已周家十萬  
道途不歎驛三千  
封疆舊占江湖濶  
驩頌新從里巷傳  
可是聖朝私此地  
教將和氣作豐年

魏我冠冕聳精神好傍軒墀對紫宸一德擬推黃帝英  
紀年還數絳人旬懸知紫詔馳三節肯使朱轡駐兩輪  
聞說邦人稱壽處香雲低覆玉嶙峋

哦詩獻壽信知難門館材多不可攀敢曳長裾居客右  
祇容濫吹列行間為陵便恐輕深谷若礪還應誓泰山  
千載通明宮殿裏常看冠珮壓清班

五言絕句

紫巖雜咏

飛瀑

欲作銀河落支筇仰面看會須雷電散已覺逼人寒

坳池

峭絕崩雲處泓澄忽此逢寧知一勺水清潤入千峯

留煙

暝色蒼然至浮煙漫不分小留巖竇底為伴宿簷雲

澣石

浙瀝排炎暑潺湲弄晚晴不知來遠近常作對床聲

送王炎弼赴山陽守以兵衛森畫戟宴寢凝清  
香為韻十首

盛世須材傑高名動聖明一麾淮海去青旆擁千兵  
別兄今幾時邦人指難弟莫誦海沂康兩馮如魯衛  
公材如武庫劒槩方森森亦復擅風流坐繼正始音  
詩成嘯諾餘謀出壺觴暇却整進賢冠麒麟要圖畫  
公家西州烈武事冠方冊祖孫世有人要足門三戟  
平生功名心不肯事酣宴向來話淮南山川眼中見

楚國尚勇力秉羽而甘寢雖無倒載名勝飲懷安鴟  
疆事須長筭朝家得實能坐來酬萬務心地自虛凝  
復旦風雲合丹心日月明江神迴朗照霽色向來清  
壺矢新油幕春蕪舊戰場候亭閒夜拆歸袖着天香

山雲

自聳干霄勢應憐望歲心試將膚寸澤來作濟時霖  
小山叢桂

暗綠團團樹浮蒼淺淺山不須吟些些幽韻已班班

七言絕句

題留煙亭

漠漠縈空漫不收，只應此地占清幽。  
雲煙本是無心物，亦為山人重挽留。

題零陵郡治環翠亭

鈴索無聲訟牒稀，雨餘四野競扶犁。  
小亭獨坐心無事，滿地綠陰山鳥啼。

醒心亭

主人誰與解春醒  
百斛香醪一小亭  
兀兀泠泠俱可樂  
醒來還醉醉還醒

荻華渚

搖搖小渚荻初成  
遠意渾疑接洞庭  
准擬秋來看積雪  
更和風雨醉時聽

睡足軒

落盡庭花日未西  
枝間栩栩定為誰  
遙知城市紛紛際  
正是幽人睡足時

潔泉

絕愛泓然一鑑渟肯教塵土犯清泠祇緣較德先生似  
不為爭名陸羽經

清富庵

一衲纏身便有餘亂山深處卜幽居舉頭物物皆呈露  
試問金多得似無

蓆蔔林

可人濃翠護微黃寶樹森森自着行居士飯餘無一事



坐來還印寂然香

凝香逕

白葛烏紗一逕長  
心清草木自成香  
何須爐裏煙成縷  
不用衣間紫作囊

野菊澗

泠泠清漲濯秋芳  
採擷堪供九日觴  
為乞曉銚真沆瀣  
不應眉壽獨南陽

遊罨畫溪有序

春深欲至畫溪堆案相仍不果往四月十八  
日舟行溪中已有後時之歎舟人見告往年  
藤花甚盛今雖花時亦無幾矣蓋盡於斧斤  
云感之為賦

春去無蹤綠滿堤空移征棹過漣漪自驚朱墨抽身晚  
不及青紅倒影時

罨畫溪頭事已空桑條都逐運斤風東君綠遍當時岸  
只欠低垂照水紅

晷畫聲名遠近知  
水光花影巧相宜  
不知此去幾多日  
重見爛斑似舊時

芭蕉

炎蒸誰解換清涼  
扇影搖搖上竹牕  
準擬小軒添睡美  
夢成風雨夜翻江

西溪冬夜

並堤松栢與雲齊  
月夜青山一望低  
山鳥不驚人迹絕  
步隨流水到前溪

偶作二首

身閒羸得閉齋房  
不向塵中染色香  
靜處試尋真面目  
光陰非短亦非長

世人言語盡君房  
一班聯玉殿香  
解識逍遙渾一致  
水鳥非短鶴非長

和史侍郎遊澹巖韻六首

底歎茲巖省見稀  
慣居故國看山圍  
應緣此日慰岑寂  
聊遣清詩為發揮

瀟湘少駐便經年自信孤忠莫問天果為冕旒歎注想  
不容泉石得高眠

隱士洪崖可拍肩尚留陳迹此山巔祇應千古人在  
陵谷高深却變遷

九重溫詔下江邊應覽甘泉舊奏篇却背煙嵐理歸棹  
曉猿夜鶴總淒然

我公得入如來室心鏡常明不用磨好倚懸崖結趺座  
任從來者問云何

眼看巖石千尋起面對爐煙一縷輕頓覺世緣無染著  
箇中消息有誰明

督幾先畫

北固江山自有餘不分清景到繩樞憑君筆底真三昧  
幻出雲煙入坐隅

李粹伯命賦枕流已讀佳篇不容着語戲書二  
伽陀問之

六尺玲瓏日日開箇中那解着纖埃主人無耳誰求洗

試問聲從何處來

水軒宴坐死灰同一息呼號萬竅風縱有溪流清似鏡  
不知何處洗虛空

和剡宰二首

綠陰匝匝欲周阿正午庭空雀可羅更許瘦筇支病骨  
玉山影裏聽絃歌

點數詩流一唯阿曾中星斗想森羅新篇莫浪傳紅粉  
堪與朱絃薦詠歌

原註來詩云一  
時分付雪兒歌

月夜再和

月當亭午憩纖阿擬逐香風到大羅  
急作新詩報天上更憑阿監一聲歌

和韓子文五首

密雲閣雨靳春晴不放芒鞋取次行  
却坐蒲團政無賴好詩端為破愁城

雪痕尚使石泉潤山色不堪煙雨昏  
見說樹頭春意動從頭花柳看村村



與君聯轡聽冬瓏下馬荀陳列座中  
南北東西鄉國異  
笑談天與一尊同

誰人解遣醉時醒始變鳴禽第一聲  
似向幽人催蠟屐  
水邊沙際看春生

寒淺定知春已至意閑仍覺日初長  
已諳榮謝如空幻  
一室蕭然且坐忘

和翁士秀瑞香水仙二首

蝶遶蜂團碧玉叢紫羅囊小透香風  
自從鼻觀銷煩惱

疑在維摩丈室中

正白深黃態自濃不將紅粉作華容  
却疑洛浦波心見  
合向瑤臺月下逢

上平江徐侍郎十絕句

露華先遣麴塵收要產英豪奠九州  
織女槎迴逢八月  
老人星見恰中秋

聲華奕世擅江南誰似公家伯仲間  
想見當年育英物  
高秋爽氣滿西山

盛德由來自邈綿偃王功德至今傳朱弓赤矢符嘉瑞  
留得陰功不計年

並列西京侍從多吾丘司馬豈同科孤忠祇有囊書在  
獨見丁寧為偃戈

五湖城郭帶重樓幕府初開第一州燕寢香凝了無事  
四郊禾穗自盈疇

繞郭舊稱家十萬朝天常恨驛三千

原註並見  
唐人詩

而今已是

繁華倍更覺旌麾近日邊

不但寬平似有功  
筆端重覩建安風  
邦人競勸金鍾醕  
願見君侯聖一中

雅歌字字巧安排  
爭頌君王治道諧  
好把扶猊奔驥手  
大書深刻著懸崖

擁麾仗節往來頻  
撫字澄清處處新  
想見茲辰介眉壽  
遙應驪動幾州人

槐鼎虛班側席求  
已應難遂寇恂留  
不如黃髮貂蟬底  
長占青雲最上頭

老農十首

雨帶好風勻淨綠雲開暖日染嬌黃今年不識農家苦  
總把陰晴屬上蒼

荷笠腰鐮醉裏回和衣卧處息如雷定無門外催租吏  
贏得柴荆日晏開

朝家寬詔年年下天上秋陽日日明租稅入官公事了  
壤歌遞與子孫賡

聞說邊隅長草萊漢家膚使漠南迴黍苗正自歸倉廩

不怕西風卷地來

田疇總是十分苗處處逢人意氣驕不問神祠賽簫鼓  
君臣有道四時調

敢將體足憚霑塗日日高原帶雨鋤乞與豐年酬作苦  
也知天意解乘除

歸牛將犢茅簷晚饑鳥窺人稻圃秋准擬明年大作社  
鷄豚須養秫須留

飽食豐年酒不空水村山崦老於農困倉在眼心無事

鄰里經過樂歲窮

兒孫力作莫辭勤  
仁政如天四海春  
盡說干湯功已就  
澤流莘野並耕人

淮上營屯盡偃戈  
官軍從此罷經過  
且書太史豐年瑞  
不數周公異畝禾

和叔武逢梅二首

愛花不厭百迴看  
細數香鬚定若干  
莫怨東風消息早  
為憑佳句喚司寒

愁中相對病中看喜愠都忘非意干從此定交形迹外  
只羞冰玉照人寒

再和前韻三首

騷人豈作腐儒酸逸氣清霄坐可干東閣只今詩興動  
韓豪元不似郊寒

幽姿健骨兩相看二絕真成聚莫干

原註莫邪干將

好學紉蘭供

楚佩瓊琚端可勝金寒

猛士相逢亦破顏恰如組練壯師干誰令野宿三更月



綴鐵成衣徹骨寒

春至無梅追用前韻一首

為覓梢頭一點酸  
縹枝紅萼謾闌干  
東君已誤當時約  
猶歛幽芳待歲寒

和粹伯七夕韻

常時淚雨久連沍  
准擬晴牕叫勃姑  
報答月華思善畫  
便和風露入新圖

原註今年六月  
七月皆無雨

天上相逢絕點塵  
莫將世態測高真  
深閨兒女傳聞誤

見說秋期便妬人

誰紀天孫謫墮時浪言能致古宣尼

原註事見異聞錄

只今天上

秋宵短莫近鷄星聽喔咿

詞

點絳脣

原註送李粹伯赴春闈

小駐征驂一尊古寺留君住六花無數飛舞朝天路

上苑繁華却似詞章富春將暮玉鞭凝竚總是經行處

點絳脣

原註汪汝馮置酒請賦芍藥

亂疊香羅玉纖微把胭脂汙靚粧無數十里揚州路

怨綠啼紅總道春歸去君知否畫欄幽處留得韶光住

浣溪沙

原註詠芍藥金縷腰海陵席上作

書漏新來一倍長衆賓霑醉尚傳觴濃雲遮日惜紅粧  
應是主人歸鳳沼為傳芳訊到黃堂腰圍恰恰束金

黃

秦樓月

原註留別海陵諸公

清秋月長空萬里煙華白煙華白江雲收盡楚天一色

尊絲惹起思歸客清光正好傷離別五湖煙水伴人  
愁絕

桃源憶故人

原註和  
翁士秀

野亭問柳今朝試更訪小園開未月下山橫空際兩兩  
修眉對騷人對此增高致意入筆端清邃投分周郎  
心醉真解消人意

踏沙行

原註春  
歸別怨

柳眼傳情花心憾恨春風處處關方寸朱簾捲盡畫屏

閑雲鬢半鞦羅衣褪 燕語鶯啼日長人困魚沉鴈斷  
無音信琵琶聲亂篆煙斜寸腸欲斷無人問

鳳棲梧

原註西溪道中作

柳弄輕黃花泣露萬疊春山不記塵寰路日射霜林煙  
罩素長空不著纖雲澗 歷歷遠村明可數綠漲前溪  
渺渺迷津渡客子光陰能幾許畫圖擬捲晴川去

祝英臺

原註和翁士秀牡丹韻

放花開催花謝誰解東君意要遣花王獨占花蹊遽且

看玉鏡臺前霞觴新舉紅玉軟曉粧慵試好風味須  
信金屋中人誰堪並嬌媚隱約微潮應向尊前醉最憐  
紋錦褰帷青羅飛蓋塵土外輕盈相倚

水調歌頭

原註送  
史侍郎

今日復何日懽動楚江濱紫泥來自天上優詔起元臣  
想見傳巖夢斷記得金甌名在却念佩蘭人永晝通明  
殿曾聽話經綸促歸裝趨北闕覲嚴宸玉階陳迹如  
故天笑一番新好借食間前箸盡吐胸中奇計指顧靜

煙塵九萬雲霄路飛步趁新春

水調歌頭

原註細君生日作

日永向槐夏繞屋樹扶疎麥秋天氣清潤設悅記生初  
新拜小君佳號更過諸郎官舍仍玩掌中珠樂事似今  
少一笑倒雙壺列山肴烹野蔌且歡娛鹿門遠引平  
生此志與君俱終向苕溪煙水攜手雲莊風月不踐利  
名區功業看兒輩相對老江湖

酹江月

原註揚州菊坡席工作

一年好處是霜輕塵斂山川如洗晚菊留花供燕賞金  
鏤寶衣鋪地舊觀初還層樓相望重見昇平際小春時  
節綺羅叢裏人醉此日武帳賢侯六年仁政決長淮  
千里欲入駕行仍緩帶聊撫竹西歌吹紫塞煙清玉關  
人老宜趣朝天騎香塵歸路舊遊回首應記

酹江月

原註宴葉叔範新第

茗溪古岸有朱門初建落成華屋對啓園林隨杖履迤  
邐柳蹊相屬好是危亭片峯迎面獨占清溪曲蕪城低



遠一塵不礙遊目 公子豪飲方酣夜堂深靜隱隱鳴  
絲竹却盡春寒賓滿坐深酌蒲萄新綠密戶儲香廣庭  
留月待得清歡足紛紛霑醉四筵倒盡羣玉

酹江月

原註詠芍藥

一年好處是滿城紅藥留連十里揚州應費了多少春  
工粧飾弱質歆風芳心帶露酒困嬌無力園林綠暗粉  
光低占叢碧 誰與千載聲名翻堦高詠出文章仙伯  
閱盡繁華芳意歇初識傾城風格雙臉晞紅春衫挽並

天巧終難敵十千沽酒筭應花畔消得

水龍吟

原註別故人

楚鄉孤黍初嘗馬蹄偶踏揚州路萼絲向老江鱸堪膾催  
人歸去秋氣蕭騷月華如洗一天風露望重重煙水吳淞  
萬頃曾約舊時鷗鷺惆悵別離無奈整孤帆依然回顧  
玉龍節底故人情重欲行猶駐斂散功多澄清志遂好  
回高步看歸鞍穩上文鴛班裏五雲深處

欽定四庫全書

集部

雲莊集卷三

詳校官起居注主事<sub>臣</sub>顧宗泰

主事<sub>臣</sub>呂雲棟覆勘

謄錄監生<sub>臣</sub>王人作

欽定四庫全書

雲莊集卷三

宋 曾協 撰

表

獻藉田賦表

歲事東郊舉百王之墜典貢詞北闕張一代之閱休謁  
地踏天間旒黻續敢恃好文之德尚寬越職之誅中謝  
竊以奉上帝之藻盛匪資人力勸下民之稼穡蓋自躬  
行豈惟供祀以訓農是乃敦本而致孝周官分職歲舉

典常漢詔垂文事存儀注詒謀甚遠繼志多違千畝荒蕪徒記箴規之語上林咫尺僅存戲弄之名蓋非特起之君莫展殊常之禮古無與擬今也其逢恭惟皇帝陛下奉三王損益之權繼二帝勲華之業九功叙而人所助一德享而天弗違大有為之時巍巍傑立甚盛德之事蕩蕩難名澤暨么微鳥魚咸若信孚幽渺神鬼克寧鳳麟號著於紀年芝鼎聲流於樂府田耕井飲莫知洪覆之功肉食帛衣但識屢豐之樂更下紫泥之詔尚勤

青輅之車萬首顚顚想履綦於阡陌羣心疊疊興耒耜  
於汙萊固已書竹素於史臣被絃歌於宗廟笙鏞在列  
何施靡靡之琴金石充庭自屏鳴鳴之缶顧臣謏薄逢  
主休明世被國恩家傳儒業竊讀古人之糟粕謬窺作  
者之藩籬發言為詩蓋聖賢之能事不歌而誦亦雅頌  
之流音泛濫虛辭不減卿雲之作周流詭辨尚因屈宋  
之餘仰惟至德之全宜黜夸詞之累約片言之或縱關  
百世之不疑甫終抱槧之工敢後叫閭之請第從臣之

頌絕妄意於末篇相康衢之謠或見收於俚韻

永州到任謝表

臣某言昨准勅差權知永州軍州事臣已於三月初三日到任望闕遙謝交割職事管幹訖者懷組去都久竊拜州之寵引麾問道更承易地之恩始服官常具宣德意中謝竊念臣進繇世賞學愧家傳少期自奮於清流壯廼遂甘於俗吏第謹詩書之習麤知孝謹之傳一踐微官寢隣撫仕備司存於百執參陪貳於上都僅逃瘵

曠之愆遽冒藩宣之寄代為牧守有慚萬石之稱官列  
大夫尤乏九能之譽維此瀟湘之會實居楚越之交仍  
漢朝初置之名存虞氏南巡之迹適寬條之始布屬荒  
政之當修雖居發粟之時政及勸耕之日周原膺膺漸  
施于耜之功陵麥青青已兆食新之喜未覺居夷之陋  
第驚去國之遙雲水攀躋敢慕宗元之縱逸巔崖鐫刻  
願賡元結之歌詩此蓋伏遇皇帝陛下盛德曲成至仁  
徧覆出號令九筵之邃遵憲章三尺之規苦身焦思將



欲責管茅之用明目張膽必使無瓜李之疑曾是微蹤  
游叨改命臣敢不力求民瘼務廣上恩分土治民敢妄  
意適遐之異因時立事固無心寬猛之間庶幾有補於  
明時抑亦不孤於先訓或收薄效仰荅殊私

代謝賜御書表

宸章炳煥掩能事於百王奎畫昭回下靈光於萬國觀  
瞻盡聳拜舞知榮中謝竊以體備六書通之蓋鮮字兼  
八法得者益稀惟帝學之高明視古人而超絕一經聖

手昭定論於太初肆闡人文陋能名於逸少擴為大賜  
覃及縣區恭惟皇帝陛下盛德日新多能天縱已致四  
方之乂靡專一藝之游正筆以心蚤悟公權之諫進技  
於道下收莊叟之言御翰墨以娛燕閒鏤金石以傳永  
久肆令最陋亦被照臨臣適奉藩條與分君賜正冠以  
拜庶幾河圖洛書之文韞匱而藏何啻璜玉精金之得  
臣無任感激屏營之至

代王楚州謝到任表

懷章問左將牧遠民下詔日邊更叨便郡既登時而引  
道乃揆日以即工甫見吏民具宣德意中謝竊以國家  
撫廣輪之地庀中外之臣任重事繁每艱民社之寄地  
饒壤沃莫盛江淮之間雖中更俶擾之煩而久遂涵濡  
之樂問險阻艱難之舊恍若前生蒙還定安集之恩殆  
將一世田疇日闢戶口歲增信使星馳第有勞迎之喜  
邊兵雨洗不知屯戍之勞夥矣遺黎隱然樂國孰副焦  
勞之念宜先慈惠之求曾是妄庸乃膺任使伏念臣稟

生多難受性至愚把玩陳編已負傳家之學激昂孤節  
自期報上之忠未輸執耒之勞遽遂彰纓之願居官白  
首半為楚甸之游許國丹心未斷淮山之夢方尚須於  
遠次亦固守於窮途身留有餘願展肺肝之蘊年運而  
往頻驚齒髮之衰何意明綸忽加誤寵此蓋恭遇皇帝  
陛下賁明庶政鼎養羣賢知人安民奉天地無私之照  
顯仁藏用合陰陽不測之神收精慮於九重軫淵衷於  
一郭肆令綿力徃布寬條臣敢不內竭疲駑仰酬造化

以書生而立武事莫追家世之餘帥疆吏以廣詔恩或稱清時之用庶收微效仰答隆私八口無飢是謂忘家之日千鍾不洎但堅移孝之心

啓

賀湯相再除左揆啓

敬審誕告明廷延登元宰代天理物特居百揆之先開國承家仍越五侯之貴錫寵名而由舊兼命數以惟新禮絕羣工慶均四海生靈鼓舞宗社尊安竊以左右之

置傳巖雖均作相之任一二以資仲父當極為臣之尊  
要令首出于百僚斯可下宜于萬物精神相得亶稱千  
載之親逢位貌絕殊將使萬邦之為憲推一心而無間  
展四體以不疑志合道同將見得君之專也官尊職大  
蓋將舉國而聽焉恭惟某官道際天人名高中夏得聖  
人耦應三聘以幡然為帝者師由一編而足矣著外撫  
內親之效彰出藩入輔之功會聖皇遵汾水之遊命舊  
德起平泉之佚無煩肖象具存說命之三篇不待割烹

咸識伊躬之五就際遺大投艱之運開重熙累洽之期  
方將建一柱以扶明堂示六符以昭上象合謀猷為黼  
宸共圖萬世之功收威柄于廟堂坐制四方之動果聞  
作命重冠在庭山川土田大啓周公之宇袞冕黻珽益  
隆漢相之儀偉東第之復興極人間之至樂綵衣入謝  
再觀上相之進趨象服受儀肆展回班之慶賀聳高風  
于紳笏流盛事于簡編助聖朝孝治之風為天下人子之  
勸豈止二十四考閱歲時禮貌之加蓋將萬有千年觀

朝夕精神之聚極幅綳帶裳之盛增旂常鼎鼐之華某  
井谷寒生門闌舊物自惟撲檄早出鑪錘每憐朽質之  
窮益負曲成之意舞手蹈足莫殫欣喜之心附翼攀鱗  
期赴功名之會

賀劉太尉啓

伏審出綸作命推轂授師賜將鉞以寵行握兵符而就  
道方朝廷謀帥誰如文武之兼資而吏士歸心逆料恩  
威之相濟副京輦藩維之重增江山形勢之雄風烈傳



聞軍民鼓舞竊以清朝置將付以訓齊平世養兵貴乎  
整暇惟此三軍之衆嘗更百戰之勞雖久憩於承平固  
未忘於勇敢欲使鴈行之增氣繫於虎帳之有人雖所  
貴於知兵然莫先於馭衆惟義足以作士志廉足以服  
人心恩足以立威公足以行法霍去病功成絕域猶不  
恤於饑寒程不識名震窮邊尚自嫌於煩擾兼是衆事  
凜乎其難獨在我公具有全美恭惟某官受材冠古降  
任自天英英非章句之儒濟濟實詩書之帥鼎彝有紀

早推世德之隆旄節相望獨擅將門之盛有如偉畧並  
亢華宗信知國士之無雙可謂中興之第一威加鄰國  
聲名可怖於四方功在本朝和好蓋成於一戰戟纛總  
十連之重班聯躋二府之崇御衆牧人共服教條之寬  
簡好賢下士盛傳尊俎之風流輟委寄於上游分顧憂  
於北固盡護諸將如陳曲逆獨當一面如韓淮陰草木  
知名已見一軍之心服旌旗改色更觀三令之風傳將  
屢上於駿功方省來於異數某資材甚少宗緒既衰慙

書劍之無成奈啼號之不置為貧求仕已乖自奮之心  
多病早衰每愧赴功之緩側聞命將共喜得賢雖酬披  
霧之私自迫及瓜之代仰瞻顏色舊知高義之可親聳  
聽風聲自覺懦夫之有立

賀梁樞密啓

伏審寵膺宸綍進翼元樞仰廟社之尊安翕官師之鼓  
舞竊以男子有四方之志蓋間氣之所鍾聖人為百世  
之師實生民之共仰雖能設教以垂世豈皆行道而得

時孰若言之於不諱之朝施之於有為之日恭惟盛世  
懋建宏規廣數路以招徠詩書禮樂以造士選羣公而  
倚用左右前後皆正人至於魁一世之英材荷上天之  
大任是為兼美允屬真儒當射策於王庭已見致君之  
定論暨參華於政路乃酬康世之初心既首被於言揚  
復踵聞於身見宜風聲之四達致歡喜之一詞恭惟某  
官覺在民先任從天降力幹千鈞之重氣回萬物之春  
地負海涵獨稟佐王之學識鸞停鵠峙共觀華國之表

儀為一時多士之師立百世懦夫之志起貴名於日月  
際盛會於風雲寓禁直於北門嘗受代言之任列從臣  
於東省更高批敕之風方作命之亟頒知登庸之有日  
某伶俜弱植孤陋寡聞早失足於世科偶寄身於吏役  
望餘光於階阼獲瞻山嶽之崇記孤迹於門闌方賴鑪  
錘之力敢叙歡忻之意益抒祈向之誠

賀湯知院啓

伏審光膺中旨進位上樞廟略縱橫久屬蒼生之望詔

音深潤益隆師尹之瞻風聲所加朝野交重竊以文武  
之備本出於相須軍國之容固由於一律國家復祖宗  
之舊列輔弼之官置左右之相以交總於政機列東西  
之府以分董於戎事安如鼎足之時備若台符之聯維  
時豪英首被圖任恭惟某官偉材經世鉅業代天廉折  
以清美若正音之播溫潤而澤粲如良玉之陳翕為吾  
道之宗允作斯文之倡掇異科而占等階邇列以升華  
翰苑專榮獨號禁中之頗牧文衡屢秉數逢閭裏之曹

劉果從共政之巍班奄宅本兵之正席籌合上意宜有  
吾子房之褒名動遠方固多彼李揆之對雅聞諸將之  
盡服無復一軍之皆驚忠謹不欺以冕旒為知己妖訛  
自息知廟堂之有人俎豆軍旅之事兼聞之太尉丞相  
之尊蓋等耳方共期於渙號即大正於鼎司俯前後之  
三三已踐斗宮之祕參上下之兩兩盍從台鉉之崇某  
結約無奇嶽嶠可笑早遊場屋濫隨俊造之後塵晚因  
簿書獲陪州縣之下列邈矣清流之遠居然俗吏之歸

屢從松竹之遊未免稻粱之迫顧惟極陋可謂至窮髀裏肉生歎初心之已負酒後耳熱覺壯志之尚存竊自念於瑣庸嘗早承於盼睵緬懷二父同登千佛之題藐是孤生謂託兩家之子每自忘於位貌猶曲記於姓名得意坦塗尚作飛黃之顧程工永夜願分隣燭之光病顙儻辱於係羈焦尾或加於撲斲三折肱之久敢自列于平生一引手之勞方有望于門下

賀王知院啓



竊審誕敷詔綽登冠樞庭帷幄居中密運止戈之武陞  
廉增峻益隆助德之威歷考簡編灼見古昔三監甫定  
周爰作於六師百粵既平漢始增於七校蓋欲示威於  
無敵亦將備患於未萌凡遇昌期必張武備連營置將  
責以訓齊無事養兵貴於整暇既用命無設施之所而  
均勞非安靖之常甘苦絕異而上下之情寢踈宴安可  
懷而紀律之防易弛必有志術得其忠心使之飽煖逸  
居常若銜恩之未報必也威愛允濟迺或流涕而用刑

結之也浹肌膚之深馭之也如臂指之易心悅誠服懷  
平日之拊循命賤威尊待一朝之號令雖赴湯蹈火而  
可用况按甲休徒之匪艱助成萬世之安坐却四方之  
侮凡茲軍政之可紀實自廟謨之有人維是傑材獨膺  
重寄恭惟某官材兼文武名蓋華戎勁氣精忠干雲霄  
而直上正言讜論質鬼神而不疑自許以古人之為可  
任以天下之重昔居烏府多膽落於霜威寢陟鑾坡亦  
涕流於雲詔已知諸將之盡服猶俟三年之有成自陞

樞斗之崇果閱星霜之變折衝綏遠爰酬命數之新經  
體贊元行副登庸之望某久廁曳裾之列嘗叨贈袞之  
榮仰之彌高同有具瞻之志喜而不寐獨懷起舞之心

賀黃同知啓

伏審進膺雲詔入踐斗宮廟廊居中密運止戈之武陞  
廉增峻益隆助德之威宗社尊安官師鼓舞竊以士得  
時而行道初不知遇合之求天降任於是人必試以阨  
窮之事乃歷千牛而不頓金由百鍊而愈剛既不失其

本心斯可臨於大節國家總文武之柄建丞疑之官方  
當多事之時尤重本兵之寄居帷幄之中而知萬里事  
機之屢至當尊俎之上而識四方戍守之異宜夫惟明  
足以察遠微斷足以濟權變威望足以落三軍之膽號  
令足以服諸將之心獨鍾不世之材斯與非常之選恭  
惟某官儲休星斗鍾秀山川洽見殫聞專師友淵源之  
盛宗論欲議包古今治忽之繁既久播於英聲嘗早陞  
於華貫窮而獨善確爾不移時可偕行沛然孰禦再履

班行之舊益推明德之隆布心腹腎腸擅知無不言之  
譽作股肱耳目副人惟求舊之圖維時共政之初翕若  
阿衡之望當四郊多壘其如責任之愈深然一士可王  
將見安強之有賴某早聆盛德辱記微蹤恩被最先實  
甚泰山之仰身求所庇莫如大厦之成

賀王同知啓

竊審進從鼇禁入秉鴻樞風烈所加未見真儒之敵儀  
型自遠共知有德之尊恭惟某官識際天人學該今古

持赤心而致主蘊素業以經邦全器難名文武維其所  
用精忠不撓安危任之以身高懷不改於險夷浩氣兼  
全於剛大久持筆橐獨結冕旒辯貫六經聊探立談之  
白璧文成數刻曾傾買賦之黃金自聞盛事之傳共企  
徽章之下延鄒枚於客右久受聖知得頗牧於禁中更  
膺天獎且熙代厯推於庶姓維相門特盛於諸王匪惟  
冠冕之相望抑亦簡編之有紀或謀謨德業凜然有大  
臣之風或學問文章允爾為百世之表適臨昌運更出

偉人方當圖任之初允屬邇遐之望某早窺聲采當辱  
甄收狐腋雖多未棄一毛之陋驥足可附不難千里之  
遙方自託於陶鎔曾不知其鼓舞

賀程叅政啓

伏審光膺命綽入與政機廟略縱橫久屬蒼生之望詔  
音深潤益隆師尹之瞻風聲所加朝野交慶恭惟某官  
偉才經世鉅業格天庶折以清美若正音之播溫潤而  
澤粲如良玉之陳翕為吾道之宗允作斯文之倡自朝

翔於近密最綿歷於歲時晚從翰墨之清班旋宅樞機  
之要地斂七兵於蘭鐙助成不殺之功還百姓於鋤犁  
盡獲有生之樂名遂而退功成不居養重望於鄉閭十  
有三載播英聲於海宇萬口一辭威名聞草木之知姓  
字入兒童之誦果趣介圭之覲且留千乘之行願公行  
勿遲共致邦人之祝然外論不爾方傾海宇之心當聖  
神親總於萬幾而輔弼備列於三省允極一道之選倚  
成萬世之功維時耆英首被圖任不見賈生之久自勤



宣室之思母以我公之歸徒有東山之歎方共期於渙  
號即大正於鼎司某結約無奇嶽崎可笑早失庭趨之  
訓粗窺家有之書偶失足於世科遂寄身於吏祿馳驅  
州縣荏苒歲時屢從松竹之遊未免稻粱之迫重念某  
甫登冠歲已出高門程藝文衡處以諸生之右剡章黼  
扆借之一字之褒自黽勉於一官忽侵尋於七閏顧無  
成之若此豈有命之使然醜顏苦負於已知歿齒忍居  
於人後靜思愚陋宜在棄捐頃因尺牘之修畧叙寸心

之蘊隨關聽覽儻辱哀憐皂蓋翻翻已處帡幪之下衮  
衣奕奕更居埏埴之間自欣幸會之逢輒寫悃悰之素  
曳裾相望曾莫與於後陳墜履見收或興憐於舊物

賀兵部湯侍郎禹立啓

伏審顯奉詔綸榮陞法從師言均穆知獻納之得人除  
目流傳播風聲而及外竊以國家品式備具章程著明  
三省並居總百僚於外治六官率屬分庶務於中臺維  
時八座之榮亞以貳卿之貴致身清切接武奮庸恭惟

某官望重儒林學優聖域愛人利物夙聞忠厚之風致  
君澤民素負經綸之志踐揚既久譽望益隆執簡烏臺  
或行且止餉軍井路盡飽而歌側席九重不見賈生之久  
還轅萬里大書季子之歸甫入奉於冕旒遂進持於筆  
橐掃棠陰而追畫像愛存兩蜀之間升金門而上玉堂  
望出百僚之右簡知特甚圖任可期某早玷後陳誤蒙  
左顧雖足跡久違於墻宇而姓名尚掛於齒牙負負無  
可言猶遠下賓之進旅欣欣有喜色獲逢君子之揆辰

賀周內翰茂振啓

伏審詔發中宸朝登內相極盛世文儒之選冠清朝供  
奉之班方滿歲為真固四海傾心之已久而舊人共政  
豈九重注意之自今竊以歷代以來百官備設翰墨文  
章之任自昔尤難論思獻納之流於斯為最自從臣列  
於盛漢成中外義理之文暨學士置於有唐居臺省司  
存之外官尊祿厚地祕職親自非聲華高出於具僚體  
裁徧周於衆製其辭章淵蘊大而為郊天告廟之文而

藻繪緒餘小可及警夜眠兒之作賞善罰惡勸懲於百  
辟發號施令鼓舞於四方豈惟密贊於聖謨抑亦顯裨  
於治效寧令虛位必待真材第驚寵數之甚優可見倚  
毗之甚重調和給君羹之美輝光分宮燭之華紫禁相  
連自遠人間之風日金堦不遠可攀天上之星辰振古  
以還得人而重恭惟某官英風蓋世間氣自天高文追  
三代之醇嘉論合六經之正連鶴疊中煩彎弓盤馬之  
勞一鶚孤騫騁聲昂霄之便嘉猷辰告令聞日彰西

掖東臺徧儀要近南宮北戶  
歷踐清華尚稽圖任之崇  
共識登庸之漸江山環繞助開胸次之奇雨露鼎來輸  
作筆端之潤暫直複門之遽徑躋二府之崇設絕禮於  
坐中寵光可待繞曼聲於殿上顯冊將頒某早以孱庸  
誤蒙甄錄施大恩於卵翼借餘論於齒牙有愧詩人身  
伴凝嚴之直方同武將涕流寬大之書益殫依斗之心  
願畢在鎔之賜

賀張舍人安國啓

竊審光對綸恩就躋星掖淹異材于滿歲示清朝守法  
之公備異數于近班彰聖世得人之盛竊以建官而訓  
以事自古則然行遠而載以文于今不廢故書命之任  
其來尚矣而體裁之當鮮或得之要當無意于為文庶  
幾不匿于厥指辨忠邪而明好惡不先偶儻之工寫要  
妙而盡精微詎借丹青之助仰惟大手最簡淵衷播告  
邇遐坦若帝王之制流傳方冊渾然虞夏之書果以殊  
知遂加申命恭惟某官運逢千載名重一時廉折以清

琴瑟自符于均節溫潤而澤璫璵無待于刻雕謹論  
議輅于上前先見敏識出于人表天鍾大任受圯上之  
一編人服博聞誦河東之三篋卓矣聖朝之望翁為士  
論之歸自布衣結旒宸之知古無與擬將端冕運甄陶  
之妙今也其時某迹困塵埃心馳斗嶽仰褒然之首舉  
識彌綸經緯之奇誦大哉之王言見潤色討論之妙共  
喜斯文之遂振且知公道之方行顧雖疎逖之蹤同有  
詠歌之志



賀新湖州程樞密啓

伏審起從真館榮鎮輔藩撫熊軾以班條方聳一圻之  
望彈貂冠而就道實歸四海之心允在門闡舉皆抃蹈  
恭惟某官材任王佐言為帝謨利器無前穎若萬金之  
寶劒直躬不倚凜如千尺之喬松心胸羅星斗之華古  
頗振風雷之厲奮髯抵几議論得其本根擲簡搖毫文  
章蓋其餘事素負經綸之業特深旒宸之知周旋視草  
之清班密勿面槐之正席幄籌默運助成不殺之功樞

柄密操力贊有成之業俄遂真庭之逸遂諧仙里之歸  
寓直太平孰若我公之最久受釐宣室果聞天子之見  
思方深圖舊之謀式贊繼新之政將入持於宰柄始暫  
析於州符幕府將開地接日圖之近騶徒始戒已傳天  
語之溫曾不俟於下車亟借籌於前箸柱石之待元老  
方傾側席之求袞繡以歸我公深切具瞻之望某瑣庸  
無取厯落多奇早窺家有之書莫逮庭趨之訓覲顏場  
屋已墜世科俯首簿書尚塵官使邈矣清流之遠居然

俗吏之歸重念某獲出高門最先多士昔元老傳潛邸  
之日在晚生偕胄子之遊方當未冠之年已出提衡之  
下寧為雞口僅成小戰之名先啗牛心遂借虛聲之重  
射石為虎再發已窮拔翼傳鳩羣飛則殆年運而往寢  
驚齒髮之早哀歲計有餘更覺詩書之可樂益厭有求  
之謬退思至當之歸憂患相仍况銷精銳田園半沒遂  
逐斗升髀裏肉生歎初心之已負酒後耳熱知壯志之  
猶存何由心迹之兩岐自覺語言之無味聽除書之傳

播聳懦志以激昂松竹相親久自安於困躋李桃猶在  
況舊出於栽培

上湖州王尚書與道啓

高門躡履纔離竹馬之羣樂土受廛值奉蘋洲之詔仰  
德既償於累歲依仁復過於平生恭惟某官學貫九流  
聲高一世溫潤而澤隨所用於圭璋廉折以清自成文  
於宮角卓爾萬人之傑隱然千載之英遠襲慶源配淮  
水靈長之勢盡鍾秀氣分天孫明潤之輝早追終賈之

聲稱久踐嚴徐之步武官居喉舌實長六卿郡號股肱  
或連十國輕裘緩帶屢書方面之功閒館珍臺聊遂燕  
休之適維名郡去長安之近正凝旒興宣室之思將大  
屬於藩條果首圖於舊德山川清遠暫持江海之一麾  
禁省凝嚴將見承明之三入願緩弓旌之賁少勤馬騎  
之臨入為三公終遂潁川之徵拜地方千里且從河內  
之借留某厯落亡奇伶俜多難私門哀落少嘗妄意於  
世科天分奇窮長乃甘心於俗吏田園索爾丘社悠然

巢林一枝未遂鷦鷯之託遶樹三匝方同烏鵲之驚昨  
滿秩於中都偶待期於近地為貧而仕作計以踈歎異  
鄉萍水之逢仰仕路雲泥之間忽覩東方之騎從乃為  
北道之主人拭目除書既罷草登樓之賦傾心報政或  
能賡樂職之詩

賀平江徐侍郎獻之啟

伏審光膺帝命就易侯藩麾從星馳播風聲于千里綸  
音天降改觀聽于四方凡屬吏民舉深抃蹈恭惟某官

宏猷瑞世雅望熙朝蔚王室之羽儀卓士林之著蔡富  
矣致身之學蔚然華國之文聳士論于一時振家聲于  
四遠持橐簪筆入居獻替之司植纛建牙出受承宣之  
寄一人注意四海具瞻豈容坐席之溫將見詔綸之出  
下車賦政暫居畫戟之深嚴乘駟造朝行被袞衣之粹  
美某效官屬邑託底下風引脰知歸方竊圖于望履揚  
眉自喜將有幸於執鞭

上建康晁留守恭道啓

光塵在望高深驚龍虎之奇文字為容庶幾同禽鳥之  
贄既叨與進敢遂陳情竊念某志或妄庸質難強勉早  
失庭趨之訓謬傳家有之書追祖考之緒餘已隳世業  
緣父兄之保任僅玷官聯甌石倚牆空空如也詩書束  
閣望望去之窮且益堅豈遂忘於先志時哉易失已深  
負於初心何圖漂泊之孤蹤廼獲覽觀於樂國山川四  
合設表裏於留都宮殿千門待往來之清蹕遞歌謠於  
比屋肅號令於三軍久懷慕藺之素心今副識韓之始



願裏趙趙之足俄遂及門戴忸怩之顏措焉無地賢愚  
相去何啻九牛之毛巨細兼收豈棄一狐之腋無能為  
役所慕執鞭恭惟某官孕秀星辰毓靈河嶽富忠言之  
活國偉厚德之照人隱然家聲著在國史或出或處無  
愧古人有德有言可傳來世弁髦翼翼皆一時人物之  
英印組纍纍為八朝氏族之冠欲扶昌運更出偉人書  
漢家鎮撫之功膺周室保釐之命旗旄道從輟禁直於  
九重樽俎笑談折遐衝於千里獨當一面坐成夾輔之

功助理萬幾行即前疑之列斯文允賴多士所歸某自  
憐末路之微蹤方借後陳之餘地蓄馬勃以待用或庶  
幾焉割牛心而知名非敢望也

長興丞任滿求批書啓

課難自脫當謹俟於譴訶情或可哀敢盡輸於悃悞遂  
忘僭冒輒叩高明竊念某樗櫟散材草茅下品早失庭  
趨之訓粗窺家有之書叨世賞以得官慨先聲之墜地  
碌碌塵埃之末區區簿領之間策蹇磨鉛冀逃瘵曠飲

永食藥祈免悔尤既擇地以不詳每籲天而奚及載念幅員之內率遵什一之供食租衣稅者既非妄輸鑿井耕田者豈容苟免雖曰徵科之有限其如劇易之不同維是長城素名大邑賦繁俗獷地瘠人貧武斷鄉曲者履犴獄如夷塗家無見糧者視銖兩為奇貨頑悍或難移於歲月飢寒或莫保於朝昏兼二者之至難視一州而特異適此及瓜之代尚遙登穀之秋閱時已迫於常期間數始盈於太半自占陽城之考誠所甘心却回墨

翟之車固知無益風中鷁退不許過都紙尾鴈行復難  
占位第徬徨而亡措姑黽勉以自寬解印綬以徑行於  
今不可掛衣冠而長往其決已難一從袖手以旁觀始  
悔噬臍之何及方州郡交嗤其不職而士民或憫其復  
來雖不能如古人之為課更以最然告之以使君之怒  
言或見從顧何力之有焉多相踵而來者方令行郡境  
敢代帥以受名且政出縣官真因人而成事正謀身之  
無策敢藉手以陳辭念大賢何所不容自知獲免若小

人必文其過終不忍為恭惟樞密相公寰宇真賢巖廊  
舊德舉正已之事以正物推愛君之心而愛民清約出  
於天資安靜符於人欲政聲四達治狀上聞扶杖叩閤  
恐此日君侯之去賜書增扶慰一方父老之心姑從河  
內之留未即潁川之拜寬和服物嘗表見於贊書輕約  
待人豈獨遺於賤品敢陳始末幸辱哀憐某儻以餘麻  
尚塵仕路銘心異日齟舌前非謹期會以為先敢許知  
事罄夙宵而自勉庶補將來

嵎縣丞通太守啓

得調銓曹效官巖邑既獲居於封部將仰奉於條章引  
脰知歸捫心自幸恭惟某官斯民先覺間世偉材孕天  
地之元精際風雲之盛會身兼數器之美氣備四時之  
和國有著龜卓矣典刑之舊人瞻斗嶽巍然德義之尊  
自奉對於大廷蚤結知於黠纘久負經綸之業暫煩鎮  
撫之才立玉英姿自與山川而映發摘雲大手坐令草  
木以增華兵衛森羅節旄交峙擁六州之鼓吹控百越

之江山綦布列城安教條之不擾雲屯萬旅謹號令以  
無譁聊嬉老監之鏡湖合傍玉皇之香案袴襦何慕共  
推仁者之安仁衮繡以歸自是相門之出相某瑣庸無  
取厯落多奇早窺家有之書莫逮庭趨之訓覲顏場屋  
已墜世科俯首簿書尚塵官使低徊十載黽勉半生第  
屬吏之貪廉儻占真清之目覈下官之勤惰敢貽涉筆  
之譏

嵯縣丞通李宰啓

茲緣末官將佐下風慰平生慕德之心繼先世同僚之  
好幸踰願始喜溢顏間伏惟某官瑞世英資傳家夙學  
竒材剴劇恢然游刃之有餘敏識造微卓若灼龜之先  
見共仰一時之人物還追累世之風流花縣優游山水  
適登臨之樂琴堂暇豫絃歌娛政事之餘坐令百里之  
得人庶俟三年而報政爰書課最行被詔褒嘆逸少以  
牛心久彰聞望展士元之驥足益赴事功某結約無竒  
嶽崎可笑低回三釜黽勉一官斯立文書敢知何事玄



度風月儻或見分芥然懦衷何有心迹之奇崛最爾弱  
質預憂拜起之舒遲

鎮江任滿通交代龔判院啓

鄉風南北居多景慕之私隨牒後先偶有交承之幸事  
踰願始喜溢顏間恭惟某官議論縱橫辭情慷慨學窮  
淵奧偉家法之得傳氣稟渾全凜祖風之不墜久宜濶  
步適爾假塗均常數於廩庖豈勞施設沸歡聲於將士  
聊助威靈行觀鳳詔之華入遶鵷行之遽某孤蹤連蹇

弱質伶俜緬懷先祖之在朝實與大賢而彙進自微而顯三騰論薦之章以退為高一上挽留之奏雖裔子賢愚之絕異而兩家臭味之固同曾是孱庸更深契好並英游於此日已懷揚粃之慚仰榮路於他年敢起積薪之歎

行在諸軍糧料院謝啓

已試罔功宜在黜幽之典惟新作命更諧重內之私覲面知慚撫躬無措竊以以祿馭富示至尊操柄之專聚

人曰財致羣下千城之用凡隸名於軍籍率仰給於縣  
官列柵綺分伍符山積科級既非一致等威幾至萬殊  
人事所難擇甲兵而即死主恩欲報援枹鼓以忘身使  
之盈志氣於無事之時所以責勇敢於有為之際刻肌  
銘骨莫移平日之心糜首捐軀期效一朝之力闢若虎  
貔之勇浩乎鵠鶴之繁或始委質以從戎或既策功而  
賜爵不可以人而悅使賦予之有偏則惟計銖而稱在  
均平而不失當求開敏以濟事功如某者井谷寒鄉簪

綏遺緒未替詩書之習尚餘孝謹之承粵自高曾以來  
不以父兄而進家繇儒顯傳四代之文科世以直聞受  
七朝之眷獎藐茲小子媿我先人傷辭氣之兩衰撫懦  
愚而何用家徒四壁莫專探討之功智效一官不救啼  
號之迫頃從疎賤初被使令蔑聞橫草之功俄請及瓜  
之代名無赫赫慚非何武之居官言本平平懼向班生  
而問策既趣裝於官次方結綬於王畿夫何頑鈍之姿  
遽受生成之賜茲蓋伏遇某官

入頌德云云

某敢不紬

繹舊聞激昂懦質會計當而已寧懷下位之慚誦說云  
乎哉益勵壯行之志庶收薄效上答殊私

臨安倅通姜運使庭彥啓

隨牒宦游莫覲侯門之邃効官京邑廼依使節之華引  
胆知歸捫心自慶竊以當行闕衣冠之會敞外臺幕府  
之崇奔走官僚居常左顧而右睨班宣條教固可朝令  
而夕行斯為依托之尤更覺歡榮之甚恭惟某官壯猷  
經世盛德佐時利器無前穎若萬金之寶劔直躬不倚

凜如千尺之喬松心胸羅星斗之華舌頰振風雷之厲  
早由簡在綽著事功更承流宣化之權受激濁揚清之  
寄報撫字之政遐追表海之風疇轉漕之勞遠繼鑿渠  
之績聲名暴白治行彰聞河圖洛書密寓雲霄之直木  
牛流馬仍居天日之畿既課最之屢書宜恩章之沓至  
持紫荷之橐入居獻納之司趨文石之班常奉清閒之  
燕某伶僇一介歷落半生世科莫並於英豪家法或餘  
於孝謹考貪廉之目庶有取於寸長覈勤惰之科或兼

收於一節

臨安倅通王帥啓

備數羣司嘗遵泉府之約束効官上國復承大帥之教  
條幸會自天依歸有地恭惟某官學該今古道貫聖賢  
氣俱備於四時身獨兼於數器溫潤而澤璫璣居清廟  
之先廉折以清琴瑟冠雅歌之首凜凜神鋒之雋恢恢  
游刃之優氷鑑洞然或指已經於平子規撫遠矣咸推  
自有於夷吾智略屢奏於上前人物獨高於朝右坐郎

官之帳列宿增輝乘使者之車二星動色遂付神京之  
劇行躋禁路之嚴直道自將允矣貴強之莫奪持心不  
擾晏然貧弱之舉安寢嘉時出於楓宸論譔遂居於芸  
閣總戎一道已兼二輔之權著績當時遠繼三王之次  
威名暴白治行彰聞鱗比萬家盡起袴襦之詠日圍千  
里自稀桴鼓之鳴既課最之屢書宜恩章之沓至持紫  
荷之橐入居獻納之司趨文石之班常奉清閒之燕某  
伶俜一介歷落半生論材宜在於棄捐持已粗知於謹



畏偶叨官使獲備屬僚五月報成已莫効涓埃之助四方取法將與觀竹帛之功惟務恭承庶逃大譴

臨安任滿通交代李倅彥將啓

結綬登朝久負妨賢之誚及瓜請代尚懷先長之慚託厚契於子孫酬願言於曩昔恭惟某官身兼衆美材過萬夫落落高標人共推於國器恢恢游刃世咸仰於吏師迨茲敷歷之多綽有事功之著宜在要津而行志尚須煩使以觀材輦轂浩繁暫倚題輿之重絲綸清潤寢

陞持橐之華難留奔逸之蹤姑借扶搖之便某仰高有  
素結好自今愧在廬前益覺妄庸之不稱請從隗始更  
欣賢俊之方來

與新臨安周倅李徹啓

壁水同升嘗愧暫先於長者日畿俱宦復慚仰並於先  
生念平時幸會之多欣此日游從之密恭惟某官文豪  
一世智過萬夫廉折以清音自諧於律呂溫潤而澤器  
實備於璫璣早登千佛之題將陟百僚之上鳴琴花縣

更稱宰字之功題坐神京頓借扶搖之便想不容於煖  
席即進列於清班某連蹇自憐推頽可笑君何見晚既  
踰請代之時公勿行遲庶獲為寮之幸

永州到任謝宰執啓

身遠脩門再閱清臺之律腰存舊組三更支郡之章曾  
是么微屢勤造化竊念某受材甚下賦分多竒場屋無  
成但藉世延之賞詩書具在實慚家學之傳昔從吏役  
之勞屢閱成期之滿寢陞撫仕謬綴周行班軍食之等

差兩總踐有司之事贊神州之彈壓一分半刺史之權  
偶逃瘴曠之愆遽冒蕃宣之寄安居私室謹俟官期方  
將襍被以問津又復假符而易命偶當故國猶有先疇  
舍舊圖新本非擇地去近即遠實出避嫌既奔走於道  
塗亦經從於里巷阡陌猶存於標榜山川未濟於平生  
固無童子之釣遊真見先人之廬舍親交咸集亦同衣  
錦之歸父老相親更免坐車之責既弗拘於文法益獲  
盡於私恩比行楚越之交正據瀟湘之會凡此閭閻之

庶適當饑饉之餘始播寬恩即修荒政開倉發粟待彼  
四方力穡服田勉之東作庶使溝中之瘠盡歸壠上之  
耕環視山川未覺居夷之陋回瞻象魏不知去國之遙  
夫何憊冥亦叨委寄此蓋伏遇某官任從天降覺在民  
先雖密贊於萬幾亦曲成於一物量能度德欲無毫髮  
之差別嫌明微不厭再三之瀆遂令改命游及寒蹤某  
敢不自激懦衷益堅素守政無寬猛事但貴於適宜地  
有適遐心實同於慕向